

PM harap lebih banyak inisiatif papar sejarah, legenda negara

Kuala Lumpur: Datuk Seri Anwar Ibrahim berharap lebih banyak inisiatif memaparkan sejarah, legenda dan mitos tempatan yang menjadi antara warisan penting negara diwujudkan dan disemarakan untuk tontonan umum.

Perdana Menteri berkata, usaha sedemikian berupaya memantapkan sektor pelancongan negara, di samping menghidupkan minat masyarakat untuk mendalami mitos, legenda dan sejarah tanah air.

Mengambil contoh Pulau Langkawi di Kedah, beliau berkata pusat peranginan popular itu tidak hanya dikenali sebagai sebuah pulau indah, tetapi penuh dengan kisah dan warisan yang patut ditelaah serta digarap generasi kini dan akan datang.

“Saya usulkan supaya juga ditambah dengan memberi gambaran hala tuju Langkawi dan teknologi baharu,” katanya dalam catatan di Facebook

beliau semalam.

Perdana Menteri ketika ini beliau berada di Pulau Langkawi, meluangkan masa bercuti bersama keluarga, selain turut dijadual menghadiri beberapa program bersama masyarakat setempat.

Mengulas lanjut, Anwar yang juga Menteri Kewangan menzahirkan rasa kagum dengan bakat kreatif ditonjolkan di Dream Forest, Langkawi, sebuah kawasan hutan belantara yang dilengkapi dengan pemetaan visual dan gabungan ritma.

“Projek ini berjaya mengetengahkan keunikan Pulau Langkawi dengan cara yang begitu berkesan, selain memaparkan legenda dan mitos tempatan yang menjadi antara sebahagian penting warisan negara.

“Saya sudah menghubungi Tan Sri Fendi (Tan Sri Mohd Effendi Norwawi) dan Puan Sri Tiara (Jacquelina) untuk menyampaikan penghargaan atas



Anwar meluangkan masa bercuti bersama keluarga di Langkawi.

(Foto FB Anwar Ibrahim)

usaha hebat mereka dalam menjayakan inisiatif ini,” katanya.

Dream Forest Langkawi yang terletak di kaki Gunung Raya menghidupkan pelbagai kisah legenda yang dikaitkan dengan

Langkawi seperti Tasik Dayang Bunting, Merong Mahawangsa dan Gergasi Langkawi.

Ia turut menyajikan sebuah pentas bayangan yang peka dengan kelestarian alam semula

jadi disamping menggunakan pencahayaan tinggi di seluruh alam magika itu, namun mempromosikan pencahayaan cekap tenaga bagi mengurangi pelepasan karbon.